

清明先夕告祖文

花徑水流新釀茅柴之酒
草堂星帶預陳藁輶之茵
嗣孫等謹諏詰旦之吉
用行孝享之儀伏乞

先靈默爲預鑒
檢點稻舂越宿香已旋升
安排堂事交階燭光
用繼好待窗前
喚曙看雲仍濟濟
躋堂料聞窗外提壺
迨露笑盈盈奠牟謹告

清明正祭文

洪維我祖 媯水流傳
幸椒聊之蕃衍

太邱望重
羨瓜瓞之綿延
茲者節屆清明
律逢姑洗
協風拂拂

廿四番花信曾催愛日遲遲百五日韶光欲暮念春暉兮莫報
相思血脉之親感春露兮頻零用起馨香之薦踰踰躋躋前人
之秩序攸分苾苾芬芬後輩之惓忱難已爰糾族眾謹奉明禋
雖非黍稷之馨愧非明德聊舉蘋蘩之祭用展孝思遠近子孫
悉整衣冠而下拜左右昭穆咸憑精爽以來臨伏冀

列祖式憑

先宗默鑒洋洋如在延俎豆於千秋濯濯厥靈啟文人于百代
祈來歆而來格亦俾熾而俾昌 尙饗

中元祀祖文

惟吾

祖潁水肇基義門啟跡功高汴宋昭穆序于一堂派衍湖湘孝友傳乎萬葉茲值槐花露艷柏子風香凡作古人俱還故里屬吾列

祖應返家祠踵元都瓜果之陳遵唐制孟蘭之設信所信於莫可信之事形以誠通親其親於久弗親之時禮從義起爰設殽饌並具楮錢甲乙次封視爲珍寶奕奕丙丁大舉化作蝴蝶翩翩于茲玉屑霏時伏冀

祖靈默佑厥後銀河耿處仍盼

祖武來臨 尙饗

冬至先夕告祖文

惟我

祖德隆星聚緒衍雲仍昭穆序于一堂繼作綿乎百代值葭動
灰飛之初屆正追遠返本之宜殷懃則著愛則存較秋報春祈
而更肅愼乎聞懃乎見與霜愴露恍以俱深欲伸祀事於來朝
牲盛用具預告祭期于今夕烏慕遙聯爰致悃忱用申薦享伏
維

昭假鑒此精虔謹告

冬至正祭文

惟我

祖基開潁水蹟啟義門

祖德悠長昭明百代 宗功浩大丕振千秋瓜衍椒綿啓人文
而篤祐文經武緯看世代以增榮凡茲燕翼之長貽允卜鴻圖
之遠振茲值一陽始復六律初調潔牲醴以告虔敢謂其儀不
忒肅駿奔以將事所宜式禮莫愆伏冀

祖有德而 宗有功子惠孔長鑒芬苾馨香而式食庶幾子言

似而孫言續寅恭罔懈許簪纓黼黻以常新 尙饗

清明祀八世祖團公文

惟我

祖功懋勤王職封信國大宋頻加曠典戶賜三千九配各著賢
聲男宜十一人恆愛敬都天案之遺像猶存家篤友恭歛田莊
之陳跡不泯允矣謀貽燕翼宜夫詩誦螽斯值茲仲春敬陳時
食伏冀先靈不昧來格來歆還祈 祖澤長流俾昌俾熾 尙
饗